

Vision di Gabinete Mike Eman ta pa e FMF tin e caracter di e distrito cu nan ta sirbi
Distrito di Savaneta ta haya e prome 'Facilidad Multi-Funcional' na Aruba



ORANJESTAD (AAN): Un punto cu den vision di Gabinete Mike Eman tin un balor hopi importante den e ehecucion di e proyecto di Facilidatnan Multi Funcional ta e presencia di e identidad di e barío den e edificio su diseño pero tambe su uzo. P'esey mes gobierno a tuma e tempo y esfuerso pa

sigura cu for di cuminsamento e caracter di e distrito ta forma parti di e sede cu pronto ta bay reemplasa e Hulpbestuurskantoor tradicional.

Un ehempel di e accionnan cu esnan encarga cu e proyecto di parti di gobierno a tuma ta di realisa consulta, no solamente cu e usuarianan actual di e hulpbestuurskantoor pa haya sa kico ta funciona y kico tin mester, pero tambe a acerca e futuro clientenan di e Facilidatnan Multi Funcional, esta e mucha y hobennan di e barío. Pa medio di esaki ta busca pa sigura cu riba termino corto y largo, e inversion y estructura di e centro lo ta altamente funcional. Algun tempo atras funcionarianan na e sede di cada Hulpbestuurskantoor a acerca clientenan cu varios preguntanan cu ta regar da diferente aspecto di e locacion y servicio manera orario, facilidad di parkeo, opcionnan di servicio y uzonan adicional. Na mesun momento a bishita e schoolnan basico y secundario y a combersa cu e hobennan

riba cua a e facilidatnan publico cu nan lo kier mira den nan barío. A analisa e informacion aki y a base di esey a bin cu guianan pa e diseño y construccion di e Facilidat Multi Funcional. Pa Gabinete Mike Eman ta masha importante pa e facilidatnan aki ta mas cu djis un oficina auxiliar di gobierno, pero pa nan fungi tambe como un punto di encuentro pa e comunidad di e distrito. E mester bira un sosten pa e bisindario su actividadnan civico y social. "E facilidad multi funcional mester ta mas cu djis un luga caminda bo ta bay busca un papel di censo of paga debe; e mester sirbi como un luga pa presentacionnan cultural, un espacio caminda hobennan por desaroya nan talento of djis haci nan les," asina Prome Minister Mike Eman durante un presentacion na e personal di Hulpbestuurskantoor na Savaneta.

Bayendo un stap mas leu Gabinete Mike Eman a busca e talento y profesionalismo di e propio hendenan di barío. P'esey mes a contrata e servicionan di

arkitecto Serge Thijssen, un Savanetero pa diseña e edificio di e Facilidat Multi Funcional. A splik'e di e concepto y e puntonan importante. Den e caso di e distrito cu tabata e prome capital di nos isla, e arkitecto a inspira su mes precisamente riba esey, pero tambe e esencia di piscamento y conexion grandi cu lama ora cu a diseña e edificio. Personal di hulpbestuurskantoor kendenan, hunto cu otro departamentonan publico adicional lo traha den e facilidad nobo, tambe a haya chens di duna nan opinion y bin cu sugerencia.

E proyecto pa reemplasa e Hulpbestuurskantoor di Noord, Paradera, Santa Cruz, Savaneta y San Nicolas ta bay destaho publico den e prome trimestre di aña y si tur cos bay bon, construccion ta bay cuminsa e aña aki mes. Pa otro aña ora e keda cla, lo ofrece un gama mas amplio di servicio y lo inclui tambe salonnan di reunion, biblioteca digital, espacionnan na aire liber y mas.

